

## ■ ROMONTSCHS EN LA BASSA

## Radunonza annuala dalla URB

**Sin sonda, ils 16 d'avrel 2016 allas 10.15 envida la URB – Uniun da las Rumantschas e dals Rumantschs en la Bassa – alla radunonza annuala el restaurant Neumarkt, Neumarkt 5, 8001 Turitg. Per la part tematica sper las tractandas statutaras sa la suprastozna dalla URB beneventar sco referenta Ladina Heimgartner, oriunda da Scuol, directura dad RTR e commembra dalla direziun da SRG.** Ensem cun il davos numer dil «Fegliet», organ d'informaziun dalla URB che cumpara treis tochen quater gadas ad onn, ei igl invit per l'annuala vegniun tarmess allas Romantschas ed als Romantschs en la Bassa aschilunsch che las adressas ein enconuschentas.

La URB ei ina uniun empau altra che biaras autras. Ins vegn buca recepiv sin fundament dad ina damonda dad esser commembra ni commember. Ins s'auza enzo leutier simplamein perquei ch'ins ei Romantsch e viva en la Bassa. Gest perquei s'auza a tut quels che han pagau en gl'onn passau in grond engraziament per lur solidaritad. Grazia a lur agid ha la URB saviu sustener musicistas e musicists, auturas ed auturs giuvens cun envidar els als inscunTERS interrumpantschs ni

cun contribuziuns a lur projects. La URB sa mirar anavos sin in interessant ed activ onn 2015. En detagl e co ei duei veser ora egl onn proxim intervegnin nus alla radunonza sezza. Schei vinavon quei a vossas enconuschentas ed a vos enconuschents en la Bassa.

## Ladina Heimgartner, referenta hospitonta

Sper las tractandas statutaras dat ei in bionten temps per la part tematica. Per lezza ha la suprastozna saviu gudignar sco referenta *Ladina Heimgartner*, oriunda da Scuol, directura dad RTR – Radio e Televisiun Rumantscha – e commembra dalla direziun dad SRG. Ella vegn a raquintar da sia veta, da sias incumbensas e finamiras ed era da sias ulteriuras activitads.

Segir intervegnin nus dad ella co la preschientscha dil lungatg romantsch al radio ed alla televisiun vesa ora suenter l'impurtanta votaziun digl onn vargau en caussa. Quella concernent la lescha da medias. Fuss quella ida dall'aua giu havess quei giu consequenzas fatalas per emissiuns en romantsch schibein al radio sco alla televisiun. Mo sco beinqualqua

ei suenter la votaziun avon la votaziun. Strusch ei la menziunada stada sut terget dat ei in nova attacca. Sco ils pli fervents adversaris digl emittur SRF da dretg public ein l'Uniun svizra d'artisanadi e mistregn (Gewerbeverband SGV), la Partida populara giuvna (junge SVP) e giuvens liberals svizzers (JFDP) semess els stadals cun l'iniziativa dil pievel «No-Billag» ch'ei vegnida lantschada cuort suenter il gie ualti magher per la nova lescha da medias en la votaziun dils 14 da zercladur 2015. Quella iniziativa vul scumandar tuttas subvenziuns dalla confederaziun per radio e televisiun. Tut duess vegnir finanziau entras vendita da concessiuns. Tgei che quei savess muntar per Radio e Televisiun Romantscha san ins sminar senza esser profet. Quei che ei cheu sin rucca sto fatschentar tuttas Romantschas e tuts Romantschs schibein el Grischun sco en la Bassa.

**Ulteriuras informaziuns:** [www.uniun-urb.ch](http://www.uniun-urb.ch) – facebook: [urb](https://www.facebook.com/urb)  
**Ei fa grond plascher da saver s'entupar cun biaras e biars da vos alla radunonza annuala da sonda, ils 16 d'avrel allas 10.15 el restaurant Neumarkt 5, 8001 Turitg.**

Per la URB: Ciril Berther, Oetwil alla Limmat



Alla radunonza annuala dalla URB dad uonn ei Ladina Heimgartner referenta hospitonta.

MAD

## Lain grischun e ses niz multifar

Tema da la novissima «Terra Grischuna»

■ (anr/gc) L'ediziun 2/2016 da la «Terra Grischuna» (TG) – era la revista da buna reclama per noss chantun – sa fatschenta extendidamain cun la muntada dal lain en e per il Grischun e descriva era ses niz e diever multifar. Punctuà vegn ch' il gaud saja da vegl ennà stà da muntada existenziala per il Grischun sco furnitur da laina, element marcant da la cuntrada e surtut per proteger da privels da la natira. El saja uschedad era l'origin dad ina chadaina per ina impurtanta creaziun da valor.

En il Grischun datti ca. 2300 personas occupadas en l'industria locala da laina. En tut èsi era radund 1600 resgiaders, lainaris, scrinaris e transportaders. Vitiers vegnan anc 700 inschigners forestals, selviculturs e blers lavurers da gaud, occupads cun la tgra da quel. 85% dal gaud appartegnan en il Grischun a las vischnancas politicas. Il lain serva era per producir energia renovabla. Avant na tant lung temp era la laina l'element principal per la construcziun da chasas sin mirs massivs – excepì en citads ed insaquant vits dal Tessin, Giura ed en il Grischun meridional.

## Divers objects, fabritgads or da lain

La scarsola da lain da Tavau ha prest conquistà l'entir mund. In temp era ella tant sco



svanida. Oz percenter vegn ella puspè introducida en pitschnas serias – sa chapescha anc adina fatg tut a maun.

Er ils fabritgants grischuns d'instruments dovran pli e pli il lain. Uschia èsi era tar *Claudio Pagelli*, a Scharons, che construescha or da lain cun success ghitarras. Ses enconuschent collega è *Werner Schär*, d'Andeer. Era datti la giuvna manufactura da clavazins Piano Rätia a Tavau. Dad al-

legar en las creativas scrinaris da mobiglias, tant en stil tradiziunal sco segund design innovativ.

## Giubileum e rar mastergn

Il «Club 1889» a Samedan po festivar ses 20. anniversari. En atgna reschia lascha el reparar custavels vehichels da la Viafier retica. Commemorà vegni quest atun cun ina festa populara. – En il territori alpin existan anc oz brischavinars, in mastergn da lunga tradiziun. Oravant tut è quai il cas en regions rumantschas sco a Surrein (famiglia Candinas) e Schnaus (*Peder Caspescha*).

## Purtret simpatic

Propi reuss è il purtret cun *Edy Walser*, Sievgia (Seewis), ch'è ina giada allevatur da chavals, ma era pur ed in collega zunt apprezzià sco collavuratur dal «Bündner Tagblatt». El ha fatg in pau dal tut en sia vita. Sa specialisà è el dentant sco correspondent principalmain sin la sparta agrara. Il radius da ses interess tanscha dentant lunsch viaden en tematicas istoricas e d'interess actual. Ses stil schurnalistic sa distingua tras ina nota zunt personala. Quai en be paucs sguards en la novissima «Terra Grischuna». Quella legian ins adina tgunsch e gugent, essend ch'ella sa preschenta era graficamain fitg bain.



Femna dal pichalain sgiaglià.

FOTOS MAD

## Il pichalain sgiaglià, l'utschè da l'on 2016

■ La Società svizra per la protecziun d'utschels (SVS) ha declerà il pichalain sgiaglià (Buntspecht) sco utschè da l'on 2016. Sco tuot las otras spezchas da sia famiglia es el da gronda importanza pel sistem ecologic da noss gods. Sia parantella chi s'inscuntra eir in nosa Val sun il pichalain verd, il pichalain nair ed il pichalain traidainta. La rain dal pichalain sgiaglià es s-chüra, las alas cun flachs albs, la baretta naira cun ün flach cotschen a la chavazza pro'l maschel e pennas cotschnas suot la cua. La femna porta üna baretta naira, l'utschè giuven üna baretta cotschna. El vala sco il plü cuntschaint pichalain in Svizra.

## Derasà in tuot l'Europa

L'intschess da viver dal pichalain sgiaglià sun ils gods da l'Europa centrala, mo eir il territori abitabel e terrain cultivà. In las Alps til inscuntraina dal fuond da la val fin al cunfin dal god alpin. In Engiadina s'ha observà üna cuada perfin sün 2200 m. El preferischa boscha d'aguoglias, impustüt il pin. D'importanza pel surviver dal pichalain sgiaglià es l'avantman da boscha veglia e laina morta. Pichalains sun agüdants dal silvicultur e consüman schurmas d'insects danaivels sco il magliascorza ed oters, mantgnond uschè ün imboschamaint san. Ün'importanta funcziun accumulischal eir sco furnitur da fouras da cuar per cuaders troglodits e mamifers, sco la sitta, sturnel, tschingallegra, squilat e perfin l'utschè mezmür.

## Üna lingua d'arpuna

Il pichalain sgiaglià preferischa sco nudrittüra impustüt las larvas dals scarafags illa laina morta. Cun sia lingua dad arpuna munida cun cuntracrötschs tira'l sia praja our dal lain. Sia udida es perfetta, el dodà perfin il rusignar da las larvas suot la scorza. Per rivar als sems illas puschas dal pin fa'l adöver d'üna «fuschina». La puscha vain francada in üna sfes-

sa da la scorza o tanter üna fuorcha da roms per martellar ils sems our da las s-chaglias. Pustüt d'inviern es el dependent da quista nudrittüra. Tscherschond il butin batta'l seis cheu cul pical lung e resistant sül trunc sainza tschüffer ün consequass da tscharvè. Sia copala es nempe plü stabila e plü grossa co pro'ls oters utschels. La colliaziun dal pical cun la copala dal cheu exista our da scuosch, ün öss plü lom e fermas musclas chi han la funcziun d'ün balchasquass. Seis corp es specialisà per la vita sül bös-ch. Il pical ha eir la funcziun da s-charpel e la cua ferma serva sco pozza per sia lavur. Las griffas e la dainta dal pè robusta pussibileschan ün rampignar svel in tschercha da butin.

## Üna foura da troglodit sco lö da cuar

Fingia bod da primavaira, dürant il temp chi van in chalur, as dodà ils bats da tambur als trunks cun buna resonanza. Il maschel avisa als oters pichalains sia preschentscha e'l cunfin da seis revier ed atira cun seis rataplan la femna. S'ha chattà il pè cumainza la construcziun da lur foura da cuar al trunc in fuorma da bavröla. Es la lavur da sia dmura a fin metta la femna illa foppa plümatschada da quella 5 fin 6 övs albs chi vegnan cuats oura in 15 dis. Ils utschlins giaschagnieus vegnan pavlats dals genituors dürant 4 eivnas es muossan alura a l'entrada, clamond per pavel. Üna famiglia da pichalains consüma sco pavel per la generaziun giuvna intuorn 150 000 insects e lur larvas.

La surfatscha dals gods in Svizra crescha d'on ad on, mo eir las influenzas nuschaivlas sün l'ambient ed eir süls gods. Pel mantegnimaint dal pichalain as stuvess mantegner ils trunks vegls, laina morta per terra chi promovua il svilp d'insects, sia nudrittüra importanta. Quai po esser d'üna vart ün dischavantag, mo da l'otra ün avantag pel surviver dal pichalain sgiaglià. *Alfons Clalüna*



Pichalain giuven cun baretta cotschna.